

乾
隆
西
藏
誌

序

史記大宛傳大夏東南有身毒國注索隱曰身音乾
毒音篤孟康云卽天竺浮圖國也杜氏通典吐蕃在
吐谷渾西南其國都號爲邏娑城舊唐書吐蕃傳號
爲邏些城扶南傳云含衛國隸屬天竺伽尸國一名
波羅奈國亦名波羅國奈斯國釋道安西域志謂波
羅祭斯國乃佛轉法輪處續漢書亦云其國修浮圖
佛道以成俗不尙殺伐今考西藏志名其地曰拉撒

其台吉有名頗羅尊者。則知古籍所載曰邏娑。曰邏些。曰拉撒。乃譯音之近似。曰波羅奈斯。曰波羅奈斯。曰頗羅尊。又字畫之舛訛。總之皆西方佛地也。然周秦西漢以上佛法未傳于中國。故其書未詳。唯考周書異記。昭王二十四年四月八日。有五色光貫太微。遍於西方。太史蘇由奏爲佛生之日。穆王五十二年二月十五日。西方有白虹十二道。南北通過。太史扈多奏爲佛涅槃之日。迨漢明帝夜夢金人。乃發使天

竺寫致梵經及釋迦像白馬馱致中夏以爲寺名由是金光流照法輪東轉至其方物事蹟微特漢之張騫甘英遍閱西土未有成書卽唐之元奘法師遊西域十七年撰記十二卷率多缺畧或亦考古者之遺憾歟欽惟我

朝

太宗文皇帝崇德七年班禪額爾德尼達賴喇嘛固始汗遣使達

盛京通貢表歲以爲常此後內臣駐劄其地鎮撫部落
護持黃教我

皇上御極以來又創立清字經館

特命大臣暨章嘉胡圖克圖等取滿洲蒙古唐古忒字
合譯漢文闡發經義雖釋迦文殊剎言之癥刮法之
痕無能過者況乎西藏爲生佛之地興教之方其山
川疆域風俗程途尤不可不詳其記載也是書傳爲
國朝果親王所撰戊申得自成都抄本爰付剞劂以公

同志云爾

崑

乾隆五十七年歲次壬子季春吉日

關中承宣使者和寧謹序

西藏誌

事蹟

西藏一隅諸鑒多未詳載考其地卽西吐蕃也唐曰
烏斯國明曰烏斯藏今日圖伯特又曰唐古忒居在
萬峯之中爲西方極勝之區環山拱合百源匯流自
墨竹工卡而下統召之南西瀉頗得天地之靈脉布
達拉之飛閣層樓麗色奪目別蚌色拉甘丹桑威四
大寺拱朝于四方東與川滇聯界西與青海接壤其

直抵河湟通西洋達噶斯天文井鬼分野時歲稍寒
物產無幾地多水泉土人以爲海眼春則凍醒夏秋
陰雨覺盛土人分爲三部曰康曰衛曰藏康者卽今
之察木多一路衛者卽西藏拉撒召一帶藏者乃後
藏扎什隆布一帶此三部皆爲番僧之淵藪黃教之
總匯其地人民尊尙佛教敬信喇嘛所最崇信者如
達賴喇嘛班禪喇嘛噶嗎巴沙嗎納等輩其他不迷
性之呼圖克圖在在皆有不能枚舉俱爲人所崇奉

信如靈神。欽若活佛。凡所謂呼圖克圖者。乃係身後知前生之事。人故敬之。然番民風俗鄙汚不堪。人皆垢面蓬頭。形類犬羊。無論僧俗。莫不以利是貪。爲尙古所不化之地。自唐孝德皇帝以公主下嫁蕃王。和親之後。始與中國通往來。其國之始爲君者。乃額勒特莽固禮之後。馬克已之子。納禮藏布。傳數世。至蘇隆藏干布。其勢始大。併西番地。內附于唐。唐以公主妻之。而蘇隆藏干布又娶白國王之女爲妾。唐公主

好善修大小二召。竝築城於布達拉。爲宮室。唐番二國分定疆界。設立誓盟。不相侵犯。立碑于大召前。永爲誓約。相傳云。昔唐三藏取經。曾履此地。今大召之前廊。尙繪有師徒四衆之像。云猪八戒招親之高老庄。亦卽今之采里。其真其誕。俗傳如斯。自唐而下。宋元之間。其國未聞。明萬歷時。太監楊英至其地。齎勅封楚布寺。業郎寺之紅帽黑帽。呼圖克圖。噶嗎巴。沙。噶。二人爲西天大善自在佛。如來大寶法王灌頂。

大國師賜予印冊、封甲操楞布氣、褒玉楞布氣、二人爲灌頂禪師。至我

太宗文皇帝之崇德七年。班禪額爾德尼、達賴喇嘛固始汗咸謂東土有

聖人出焉。遣使達

盛京、約行善事。歲通貢表。西藏大召之地、呼爲拉撒。拉撒者、華言佛地也。舊有城廓。于康熙六十年、定西將軍護國公策旺諾爾布毀之、改築西南石堤、自東北



郎路山脚起至布達拉對面小山招拉筆洞止長約三十里以遏藏江之水勢今呼爲神堤每歲正月聚各寺喇嘛于大召內念大經畢令衆喇嘛各增添砌惟此乃喇嘛一役至番王蘇隆藏千布乃觀音菩薩分體之光化生故常在輪迴而其本性不昧曰根敦朱巴曰根敦姜錯曰朔納木姜錯曰雲登姜錯曰阿旺羅藏姜錯曰羅進仁進姜錯相繼轉生凡六世皆稱爲達賴喇嘛而興黃教于西域第五輩達賴喇嘛

八觀

世祖章皇帝勅賜金冊印封爲臣領西天佛教普覺幹濟達賴喇嘛時有蒙古古什罕自青海起兵滅藏巴罕據其地至其子達彥罕孫達賴罕皆敬附中國後有牒巴三節者專國倡亂古什罕曾孫拉藏滅之蒙

聖祖仁皇帝褒封命嗣爲罕而達賴喇嘛又化生于裡塘地方名曰噶爾藏嘉慕青海蒙古稱爲呼必爾罕蠻人稱爲申凹革桑姜錯生二歲青海蒙古搬至西寧

之塔爾寺坐床復爲西方瞻仰適準噶爾逆賊策妄
阿拉布坦妄自生釁自伊里遣其賊將策冷敦多布
領兵攻殺拉藏罕擄其子蘇爾札毀滅黃教荼毒生
靈肆行猖獗蹂躪藏地我

聖祖仁皇帝天地爲心以一隅之未靖慮一夫之失所

特遣將軍額倫特都統色倫額韋職四川提督康泰統滿
漢官兵分道勦伐渡通天河三敗賊衆而策冷敦多
布分兵逼我糧餉軍中食盡將士枵腹至哈拉烏蘇

爲賊所困全軍餓斃其提督康泰至拉里之西爲賊
僧黑喇嘛誘殺于是賊衆復逞螳臂肆其跳梁燬壞
經典竊據藏地

聖祖仁皇帝赫然震怒遣靖逆將軍富寧安駐兵巴爾庫
爾以分賊勢爰

命皇子允禔爲撫遠大將軍統帥六師駐節西寧調餉徵
兵將塔爾寺之呼必爾罕

錫以達賴喇嘛名號給與冊印俾其主持黃教由是遣平

逆將軍宗室延信固原提督馬繼伯加議政大臣銜
山東登州鎮總兵官李麟等率領陝甘滿漢官兵于
康熙五十九年夏四月護送達賴喇嘛自西寧出口
進征而策冷敦多布猶敢施其故智三襲我營俱爲
我軍所破斬獲甚衆賊帥胆喪大將軍又遣征西將
軍噶爾弼四川永寧協副將岳鍾琪爲先鋒統領川
滇楚浙滿漢官兵由蜀之打箭爐出口大將軍駐劄
木魯烏素居中調度秋九月大兵會于藏擒巨賊藍

占巴駝駝宰桑黑喇嘛偽藏王達格咱等招降逆羽
夷衆于是策令敦多布計窮力竭狼狽遁歸西藏底
定人民奠安月之十五日送達賴喇嘛坐床

勅封承教度生達賴喇嘛將其地土人民賜之居于布達
拉有

御制碑文鑄石築亭于布達拉之南以誌其事其康濟
阿爾布巴隆布爾頗羅爾扎爾等五人

賜封有差於大召寺內設立公所五人會辦西藏大小事

務康齊噶係後藏人、昔爲拉藏罕、仲意因準噶爾犯藏、努力堅守阿里有功、封爲貝勒、管理後藏以西之北一帶地方、並拉藏罕屬下台吉阿旺雲登都納爾等二十餘人、及蒙古二千餘、住居西藏、均食藏內餉糧、爲達賴喇嘛護衛、遇有兵馬事宜、卽帶此等行走、阿爾布巴係工布人、昔爲噶隆準噶爾犯藏、堵禦工布口子有功、封爲貝子、管理工布以東一帶地方、兵馬事務、隆布噶係本藏人、昔爲噶隆、因策冷敦多布

侵藏同扎爾噶赴木魯烏素迎接大兵嚮導有功封
爲公管理西藏東北一帶地方兵馬事宜頗羅噶係
後藏人昔爲拉藏罕仲意準噶爾犯藏領兵迎敵被
擒不降始封爲一等噶隆辦理達賴喇嘛商上
事務封爲一等公管理後藏扎什隆布一帶地方
兵馬事務扎爾噶係藏人昔爲達賴喇嘛蒼儲巴
同隆布噶嚮導有功授爲噶隆又封爲一等台吉管
理藏內附近地方兵馬事務安輯奠定大兵凱旋至

雍正元年青海羅卜藏丹津犯順恐其擾藏時撫遠大將軍年羹堯遣松潘鎮總兵官周瑛領川兵二千餘名由打箭爐出~~四川~~霍耳甘孜一帶招撫未順番夷一抵西藏年羹堯又遣雲南提督郝玉麟統領雲貴官兵千餘員名駐劄察木多以爲聲援于次年六月探報羅卜藏丹津遁入藏境之克里野地方總兵官周瑛選精騎三百同貝勒康濟鵠帶番兵萬餘由楊八景一路兼程追逐至噶爾藏骨岔阻雪回兵是

年達賴喇嘛

勅封西天大善自在佛率領天下釋教達賴喇嘛予以金冊印雍正三年師旋陞周瑛爲四川提督于次年春撫卹類烏齊一帶番民雍正五年貝子阿爾布巴公隆布魯、台吉扎爾瑪等謀殺貝勒康濟烏背逆不道藏民告變蒙

世宗憲皇帝命內閣學士僧格副都統馬臘洮岷協副將顏清如先馳赴藏撫綏人民以安番衆次年夏四月

特遣都察院左都御史查郎阿爲正帥護軍統領邁祿西
寧鎮總兵官周開捷副之率領永昌協副將馬紀師
神木協副將周起鳳花馬協副將惠延祖波羅協副
將劉永貴及叅遊各四員帶領滿漢官兵八千四百
餘員名由西寧出口

命散秩大臣兼鑾儀衛周瑛爲正帥化林協副將楊大立
夔州協副將張翌竝遊守各四員領川兵四千餘騎
由霍甘一路派雲南鶴麗鎮總兵官南天祥援勦劍

州協副將姚起龍廣羅協副將馮鑾及遊守各三員
帥滇兵三千名由昌多一路三路官兵尙未抵藏台
吉頗羅鵲糾後藏阿里扎什隆布等處番夷二千餘
衆直搗召地擒獲阿爾布巴等大兵到藏縛獻軍營
維時左都御史查郎阿等公同審實

奏其叛跡于九月晦日梟阿爾布巴隆布鵲札爾鵲等
併誅其子于布達拉之前藏地復安

勅封頗羅鵲爲貝子總管西藏事並議移達賴喇嘛于裏

塘以杜欒端由是留學士僧格副都統馬臘前鋒統領邁祿散秩大臣周瑛副將馬紀師竝遊守各四員秦蜀兵二千名鎮撫其地察木多留滇兵一千名派提督張耀祖劍州協副將姚起龍遊守各一員駐劄其地以作藏兵聲援是年十一月二十三日左都御史轉陞吏部尚書查郎阿西寧鎮總兵周開捷領官兵五千餘員名護送達賴喇嘛自召起程至裡塘四川重慶鎮總兵官任國學帶領兵一千名接替護衛

大兵卽由裡塘各回本汛已酉秋周瑛被劾回京就
訊派西寧鎮總兵官包進忠頂補周瑛之缺雍正八
年準噶爾侵犯巴爾庫爾卡倫駐藏大臣

奏准派學士僧格總領遊守各三員兵一千五百名及
唐古忒兵一千出防騰格里打莽邊其奔藏之路復
于玉樹白兔河奔卡立瑪爾納克產生根物角四處
各派千把總一員帶番漢兵數十名設卡偵探每年
秋雪降封山撤回藏內是年打箭爐口外之噶達地

方廟工告竣

欽賜匾額曰惠遠廟達賴喇嘛移駐焉裁化林協于惠遠
添協曰泰寧除協兵另駐兵千有八百均爲達賴喇
嘛之防護雍正九年春總兵官包進忠卒學士僧格
陞蒙古都統出防騰格那爾夏六月護軍統領青保
大理寺正卿苗壽泰寧協副將加總兵銜楊大立領
川兵千五百來藏換副都統馬臘及舊駐藏并臺汛
川陝兵一千五百名于冬月廿副都統馬臘統領換

回其駐察木多滇省官兵亦一例更換十年春陞青
保蒙古都統同加銜總兵楊大立出防騰格那爾楊
大立旋緣事解京秋七月轉陞青保滿洲都統是年
副都統李柱西寧鎮總兵官周起鳳四川督標中軍
副將張可才遊守各二員兵一千名更換都統僧格
前鋒統領邁祿永昌協副將馬紀師舊駐川陝官兵
而副都統李柱至甲工病故冬十二月總兵官周起
鳳領兵抵藏越四日永昌協副將馬紀師率川陝官

兵一千名回汎十一年春都統青保副將張可才出防騰裕那爾復蒙

世宗憲皇帝軫念番民積年勞苦

特命于色拉召之間札溪地方另建城垣留兵五百名其餘撤回夏四月防兵回藏而京來換防之原任工部尚書副都統馬臘抵召于是都統僧格前鋒統領邁祿副將張可才率領官兵于七月中旬分撥起程八月城工竣重陽朔四日兵移駐札溪新城十二年都

統青保大理寺正卿苗壽緣事拏解回京派出接替之散秩大臣伯阿爾珣副都統那蘇泰秋八月至藏阿爾珣卒于是月其駐劄察木多滇兵全議撤回汛塘川兵千名內減撤四百派都司一員統領移駐察木多雍正十三年準噶爾遣使求成蒙

世宗憲皇帝軫念生靈疾勞允其所請定界息兵又以達賴喇嘛久離藏地令其回召以遂其性

特命果親王至泰寧賜以筵宴派副都統福壽兵部郎中

祁山理藩院郎中拉布坦四川督標中軍副將張聖
學領駐防泰寧官兵五百名于夏四月護送達賴喇
嘛同章嘉呼圖克圖惠遠起程七月望二日抵召越
七日送達賴喇嘛至布達拉坐床八月二十三日郎
中拉布坦卒九月二十五日郎中祁山副將張聖學
帶兵二百五十名送章嘉呼圖克圖赴後藏禮班禪
喇嘛傳衣受戒冬至日事畢回召十二月朔三日頒
齋

世宗憲皇帝遺詔至藏乾隆元年章嘉呼圖克圖同齋
詔熬茶之侍衛等帶領副將張聖學併原護送達賴喇嘛
來藏之川兵自藏起程而入都矣

疆圉

西藏東至巴塘之南墩寧靜山爲界由拉撒行十里
許過機楮河卽藏江其渡設有皮木船以備通涉至
德慶有縱凡所謂縱者係傍山砌房乃其頭目牒巴
據險守隘之所俱是官署其平地無隘之官署名曰

噶至墨竹工卡皆平川俱設有縱設兵守隘自此東
行道路窄狹崎嶇難行工布 江達 拉里 說板
多 洛隆宗 昌都皆爲要隘各安兵設防按其地
康熙三十八年提督唐希順據化林守備王允吉等
原報一案興師克打箭爐定界于中渡康熙五十八
年永寧協副將岳鍾琪斬達哇藍占巴布木咱等九
人都統法臘于五月十八日令永寧副將岳鍾琪領
官兵一千進取巴塘令成都縣教諭楊世祿先行招

撫五月二十六日巴塘營官結果翁布二人隨楊世祿齎土地戶口冊近投副將岳鍾琪于奔卡木地方巴塘裡塘始定七月據差成都府同知馬世烜四川提標後營遊擊黃喜林報招乍了 察娃作貢 奔達 桑阿却宗 察木多等處五十九年大兵隨定西將軍葛爾弼于八月定藏雍正三年松潘鎮總兵官周瑛勘定疆址始定于南墩寧靜山嶺上爲界竝建分界牌嶺東之巴塘裡塘屬四川嶺西屬西藏其

中叶察卡中甸屬雲南三處疆界始分

西藏南至狍猱茹巴之怒江爲界由拉撒東南行一日
過鍋噶拉大山至宋布堡過米噶拉山札拉山至押
噶交藏江至怒江皆有隘設防按其地疆址廣濶無
垠不能悉載而怒江之水不知其源江寬數里兩岸
壁削中流急湍人莫能渡其北一帶亦名工布綿亘
頗廣南卽狍猱中隔一江狍猱乃野人名老卡止嘴
割數缺塗以五色性喜鹽其地產茜草水竹紫草茸

不耕不織穴室巢居獵牲爲食藏內有犯死罪者人
解送過江羣老卡止分而啖之西南接布魯克巴爾
布通西洋等處其怒江之外莫知爲何地自怒江
北五口至咱義四日至桑阿却宗又九日至靈卡石
過浪滄江至察娃作貢又七日至阿布拉塘交南墩
大路二西至南噶爲界拉撒召西行二十五里出東
閣兒關由業党槽過鐵索橋至干巴白爾極過甘不
拉云卽西崑崙山走仁蚌至扎什隆布由三桑撒噶

著虛等處過墨爾拉大山西至甲噶其駐兵防範按
甲噶亦頗廣濶其業党楮之鐵索橋乃第一守險之
區過橋由西崑崙山下至羊卓白地沿海行走其海
週圍數千里海中有山寺名多爾吉拔母宮由仁蚌
至日蓋子卽扎什隆布仍仲寧翁結巴寺之後山自
扎什隆布西行十日至三桑乃阿里地方交界由三
桑至崗得寨入河里噶爾渡地方頗羅鶴長子朱爾
瑪特策登駐防之處查阿里地方甚大稍西北乃納

達克酋長得中南木查爾地土一半係符古結寒地
土谷古結塞酋長之女與朱爾嗎特策登爲妻三部
通好其納達克谷古結塞二姓乃新撫之地甲噶西
北距準噶爾界西南通卡契纏頭回民界其扎什隆
布江孜西南地方爲前藏後藏屏藩一由納格爾八
日至怕爾與布魯克巴交界山川險峻難以出入亦
設兵防守一由業爾奇木樣納山業郎地方至結隆
與者木雄宗里口交界一由業爾斯卡祿納山業郎

塞爾地方交白布界俱屬險道互相通好安兵守隘
西南界址止此三部矣 北至準噶爾爲界由拉撒
西行過浪子至德慶俱有縱以守隘向北行出楊八
景口至新橋卽平川西通後藏東接達旦西北一帶
有克里野大山廣濶爲準噶爾要徑過山卽準噶爾
葉爾羌地方各設卡拒防 按其地卽草地由克中
野山脚納克產隘口北通哈貝得不忒爾又北直不
木魯烏素擺度等處乃交往西寧大道其東接玉樹

等處界又由楊八景至桑沱洛海過紅塔爾小山至
拉定過納根山卽騰格那爾打木地方係每年出防
處由吉扎布至生根物角隘東北至噶爾藏骨岔阿
爾坦諾爾一帶俱係通準噶爾界皆設有隘口截防
西藏東北直接西寧界由拉撒北行十里向色拉寺
東過郭拉至浪宕由隆竹松過彭多河有鐵索橋設
有皮船濟渡安兵防隘過河由角子拉熱正寺增項
工至木魯烏素卽西寧界駐兵爲汛守之地 按其

方爲四通之區東北接西寧所管之南稱巴彥等番族又通洛隆宗類烏齊地方由木魯烏素通西寧大道由玉樹接西寧松潘泰寧三處玉樹亦準噶爾來藏之路于玉樹之白克河設卡東南接類烏齊地方山拉撒郎路山轉出大則其地有縱至唐家骨東有鐵索橋設有皮木船通渡憑河守隘由竹貢寺至沙金塘皆係草地走吉樹邊卡過江党橋至春奔色擦接類烏齊界通昌都大道

西藏東至打箭爐八十四日南至工布狛狛三十五
日西至甲噶九十五日北至生根物角四十日正東
至巴塘四川界正南至狛狛阿咱界正西至阿里納
達克交界正北至白兔河皂哈界東南至木魯巴東
雲南交界東北至娘錯松潘泰寧東西南至白布卡
契界西北至鍋壁準噶爾界以上所稱鍋壁者乃砂
磧之地寸草勺水全無凡呼拉者卽華言山也

山川

東方之山

祿馬嶺山不甚高綿長百里四時積雪烟瘴難行離藏七日過山二日至工布江達北有敵工隘以拒準噶爾倚山爲勢設橋爲防別無他徑可通乃西藏咽喉之地

濯拉漢人呼爲瓦子山層層頑石狀如瓦片故名上下約五十里路崎有瘴難行離江達二日

拉里山崎嶇險陡四時積雪上下五十里下至拉里

北接玉樹乃青海要津離濯拉一日

魯工拉不甚陡峻途長百餘里盛夏積雪不消曩有
數仞深者烟瘴甚盛最爲難行道旁之人畜骷髏棄
途填壑不知凡幾離拉里一日

砂工拉高險難行綿長百餘里四時積雪盛夏不消
烟瘴撲人亦是骷髏之地離拉里七日

賽瓦合拉雖不甚陡而綿亘百餘里四時積雪有烟
瘴離砂工拉四日過山二日至說拔多又二日至洛

宗北通青海南接咱義堪稱重地間有夾填出沒其中

瓦合一柱拉不甚陡而路險難行一連四山相接綿長百六十里四時積雪有深數十丈之窖行其上愁雲瘴霧日色慘澹鳥獸藏跡別是一天風景按康熙五十九年雲南官兵三百餘員名至此山下劄營一夜風雪人馬盡僵離洛隆宗四日

過脚山路陡積雪綿長五十里有烟瘴離瓦合一柱

拉三日過山至昌都二日乃川滇西藏三界之中最
爲重地兩河環抱左右有大木橋東走四川南達雲
南西通西藏北通青海乃扼要之樞

昂地山陡險積雪有瘴途長百里離昌都七日

大所山崎陡積雪有瘴途長百二十里離巴塘一日
立登三巴山路陡有瘴途長五十里離巴塘二日
納哇奔松山路崎有瘴途長六十里離巴塘七日
撥浪工山有瘴綿長九十里離德靖營西一日

高日寺山途長六十里離德靖營二日

折多山路崎有瘴途長五十里離打箭爐一日自昌
都至此其中之昂地乍丫洛家宗石板溝谷忝江卡
兒空子頂等處爲官角桑昂邦上下打拉一帶夾垣
出沒之所

東方之川

機楮河卽藏江有船通渡離召十里

工布江達河有橋設隘

拉里河離拉里東半里許夏秋泛漲湍急難渡

假夷三巴橋河離洛隆宗一日左山右河最險有橋
拉工河有橋離昌都西三日

六古三巴河有橋離昌都西三十里

察木多河分左右二江有大木橋

察木道即昌都康平

金沙江即巴塘河江百二十里至竹巴隆過渡有船

雅隆江即中渡德靖營有船

南方之山

鍋噶拉高大積雪難行途長百里離召一日

宗噶拉連絡重叠崎嶇難行途長八十里離召三日
扎拉路崎不甚險途長五十里與宗噶拉相連

南方之川

春結卽藏江

前后藏之河會流于南由赤書羅卜喜洛出藏境

洛巴河卽工布江達之水皮船通渡

怒江卽外夷界不可渡

西方之山

阿里拉高大多瘴途長八百餘里積雪奇冷不可行
甘不拉卽西崑崙山路崎難行途長九十里

鍋噶拉途長七十里路崎多瘴

墨雨拉高峻積雪有烟瘴途長百里

西方之川

菜党楮河有鐵索橋乃守隘要地

藏布河

羊木陸海自扎什隆布至阿里夏天隨地皆水人呼

曰海

北方之山

喇根拉在騰格那爾東途長五十里

克里野拉千餘里淤沙積雪烟瘴逼人冬夏不可行
自楊八景入草地由哈拉烏素至玉樹白兎河等處
皆大山平川夏秋濕潮冬春多瘴

北方之川

彭多河有鐵索橋亦有皮船離藏三日

哈拉烏素皮船通渡離藏八日

阿克打木離藏二十五日

春良諾爾離藏九日卽天池也

寺廟

大召在拉撒內名曰老木卽建自唐時坐東向西樓高四層上有金殿五座闌干殿宇皆係銅底溜金宏敞壯麗煥然奪目寶珍奇玩畢聚于內中殿供大佛名覺釋伽摩尼云自中土侍隋唐公主至藏年甫一

十二歲成聖西域或云自中國鑄請來者左廊有唐公主暨土蕃贊普竝白布國王女塑像祀之其內神佛萬計皆用大銅缸貯酥油點燈爲供惟唐公主前不點酥油燈樓頂東南隅金殿內有百喇末殿神名百喇末云係唐公主威聖神靈顯赫人民敬畏之漢人有稱騾子天王者內藏尙古軍器其劍長五六尺鳥鎗有八九尺一丈長者形與今之五子炮同弓韞箭袋亦甚大其箭有四五尺長者殊爲異觀大殿內

有明萬歷時太監楊英所立碑一通殿門外前廊壁上繪有唐三藏師徒四衆像昔唐公主晚年好佛皈依釋教故西向其門門外唐番和盟碑高約一丈五尺寬約四尺厚約三尺兩旁刊有大臣太宰尙書等字跡並牛僧儒姓名但年遠模糊不能悉讀僅錄其略載于後編碑旁有唐植古柳二株老幹盤屈若龍虬然

小召在大召北半里許名曰喇木契樓高三層上有

金殿一座寺乃唐公主所建坐西因唐公主悲思帝鄉故東向其門殿內之佛像名曰珠多吉云係覺釋伽摩尼之弟甫八歲成佛又云塑像內卽唐公主肉身俗傳如此座上額書默療能仁四字南卽頗羅鵒住宅

垂仲殿在大召東半里許寺名噶嗎霞內塑神像猊獐惡煞內居護法乃喇嘛裝束仍娶妻生子世傳其術卽中華之巫類每月初二十六下神頭戴金盔

上插鷄羽一束高約二三尺穿甲背插小旗五面周身以白哈達結束足穿虎皮靴手執弓刀登坐法台凡人叩問吉凶託神言判禍福出則人從裝束鬼怪執旗鼓導引寺內多畜放牲野獸熊狼等類凡各大寺皆有垂仲亦有女人爲之者俱爲番人所敬信崇奉焉

木鹿寺在大召北小召東樓高四層亦頗壯麗廣濶乃係西番僧人習經之所寺西有經園造各種經文

頒行各處菊岡寺接連經園各種蒙古僧人學經之所樓高三層

玉奪三巴橋在拉撒之西一里牆係綠琉璃瓦所蓋云建自唐時漢人呼爲琉璃橋由此西行里許卽布達拉

布達拉乃平地起一石山高約二里許就其山勢疊砌成樓高一十三層上有金殿三座亦唐公主所建之宮室其金殿之下有金塔五座西殿有黃帽喇嘛

之祖師宗卡巴手足印在一黃酥油上日久不化名
殿中陳設歷代寶珍器皿充盈彙集達賴喇嘛居住
于內乃西藏第一勝區也招拉筆洞山寺在布達拉
西南山脚亦係平地湧起石山山頂建寺形如磨盤
漢人呼爲磨盤山登其上甚險山之南崖下卽藏江
寺內喇嘛皆業醫道

祿康揮木在布達拉後有一方池周圍約四里中築
一臺上建八角琉璃亭高四層又名水閣涼亭皮船

通渡召五世達賴喇嘛坐靜處

宗角在布達拉北二里許係達賴喇嘛避暑處後爲

佛姊居住

卽呼必爾罕之姊
雍正十二年病故

卡契園在布達拉西五里許勞湖柳林內乃纏頭回

民禮拜之所有魚池經堂禮拜臺花草芳菲可人

疏日崗在布達拉西七里許乃達賴喇嘛班禪喇嘛

往來停驂飲茶之所人亦呼經園

別蚌寺拉撒西去二十里依山佈立層樓數重周環

數匝內金殿三座有達賴喇嘛避暑花園一所每年亦至此講經一次寺內乃漢人蒙古西番楊土司魯土司布爾康布木等處之人住居習學藏經有達賴喇嘛揀派掌黃教之呼圖克圖北薩楞布氣居此下山里許有垂仲殿乃護法喇嘛所居此處垂仲無妻室亦降神附體判斷禍福其他垂仲到處有之有有妻者有無妻者不能枚舉

仍仲寧翁結巴寺大召西去八日卽後藏扎什隆布

地其寺背山臨河院宇敞麗佛像莊嚴乃班禪喇嘛
坐床之所各處朝禮番夷不絕于道凡學經成者必
至此受戒取名熬茶施衆考班禪乃金剛化生第一
世名桑吉年地楞桂凡轉生十三世第十二世班陳
羅藏吉堅魯八觀

世祖章皇贈同五世達賴喇嘛十三世名直俊羅桑益喜
我

朝疊加恩禮乾隆二年圓寂轉生十四世乾隆六年坐床

矣

撒家寺在扎什隆布境內有撒家班禪乃紅喇嘛之祖師其教喇嘛年少時娶妻生子俟有子後不復再近室家始登法坐按輩相傳尊尙亦同達賴班禪諺云若無其子則西番人當盡滅矣

多爾吉拔姆宮在羊卓白地海中自拉撒西行半月海中有山上建寺極宏麗有瀛洲蓬島之跡寺內乃女呼圖克圖多爾吉拔姆所居云北斗之精化生昔

牒巴三節亂藏時化猪遯去藏地呼猪曰拔故名
色拉寺召北十里依山成勢砌房層樓參差高聳圍
牆如廊內金殿三座圓亭數處達賴喇嘛歲至講經
一次寺有掌教呼圖克圖主之喇嘛約四五千衆內
有鐵杵一枝長不足二尺一頭如三稜錐一頭如人
頭狀者三如帝馱所執降魔杵云昔建寺時自西天
飛來者人咸爭禮之

達隆寺自召北行過郭納山一日寺亦宏麗喇嘛約

千餘

熱正寺自東北二日角子拉上寺內喇嘛衆多山徑曲折鳥獸寂無欲觀喇嘛振鐸俄項山禽獐鹿諸類畢集

楚布寺業郎寺去召北七十里之浪子地方各有掌教呼圖克圖主之紅帽之宗名噶嗎巴黑帽之宗名沙嗎納萬歷時曾入覲勅賜封號冊印至

世祖章皇帝賜勅封大寶法王印今承襲衣鉢者一名扎

哇楞布氣一名革桑楞布氣

甘丹寺召東九十里形勢同布達拉極其華麗乃宗卡巴坐床之所山上多有遺跡爲黃帽喇嘛發源之地

江巴林寺在昌都其寺東向內有金頂一座樓台院宇宏濶壯麗亦康藏之勝區寺有掌教呼圖克圖二人一名教巴喇戈喜丹奔俄木一名拔巴丹奔姜錯桑鳶寺在召東二日內供

聖帝君傳云唐以前其方多鬼怪爲害人民不安帝君
降聖除之人始蕃息土民建寺以奉之稱尊號曰草
塞結波其寺喇嘛頗衆達賴喇嘛歲至講經其地有
查洋宗山山上名多機扎古寺有洞高二千餘丈梯
木而上洞內石蓮花佛座前石几石盒內有白土可
食味如糍粑次日復生其洞須燃火而入座後有一
大海云作惡之人至此必失足墮海中番人畏憚而
不敢忽

西藏寺廟不可勝計僅摘其著名最大者而錄如
右計康衛藏三處上冊有名之寺三千餘支糧之
喇嘛八萬四千餘衆其他不甚著名之寺廟喇嘛尤
多其呼圖克圖中之聲名最著者如西都楞布氣
多爾吉拔姆 扎薩楞布氣 三巴呼圖克圖
噶爾嗎呼圖克圖 阿嗎記仲呼圖克圖 阿里
竹孫呼圖克圖 阿噶仲吉地母呼圖克圖等類
亦難殫述各居大寺皆係番民所最崇信敬奉者

各有采地坐屬其方卽同該頭人管束番民祿養亦卽取給斯方凡大呼圖克圖之下必設倉儲巴一人辦理地方事務凡大寺院必設誕布喇嘛一名管束僧衆有一二品至沒品者量寺之大小酌其品第耳

天時

藏地高下不一寒暄各異平壤則熱高平則冷有十里不同天之語晴雨靡常風霾無定就拉撒而論其

地冬雖寒而不凜冽夏雖暑而不薰蒸清明立夏之間草木萌芽季春夏初之際麥豆播種收穫則在七八月之交蓋高下寒暄之各殊故先後遲早之不同也

物產

拉撒穀屬產青稞小麥胡豆豌豆菜子自他處販來者則菜豆黃豆冰豆稻米黑糖蔬屬則圓根蔥蒜蔥茭近漢人自中國帶菜種有白菜蒿苣菠菜莧菜苤

萊羅葡萄蒿四季豆苦豆牲蓄則馬騾驢犂牛黃牛
長毛牛猪頗小至大不過四五十觔雞亦小野牲則
天鵝黃鴨白鵬大鷹黃鷹雉兔狐細鱗魚花果則芍
藥牡丹西天剪碎絨蜀葵金盞嬰粟虞美人山丹有
白二色紫金蓮藏菊花有紅黃二色馬蘭松柏柳白楊桃林
檉胡桃自他處來者則葡萄棗杏服物則氍毹子氍毹
毛氍毹鐵乃一種毛氍別名裁絨拉撒東至祿馬嶺
土民皆稱百巴出產同召工布江達產裁絨騾子大

頭狗其餘出產同藏自工布江達至寧多濯拉阿雜
一帶土民俱名工固拉里不產五穀以牧畜生牛羊
爲食大窩說板多洛隆宗土產皆同藏地說板多山
後有金廠有黑帳房洛隆宗南去二日有浪岩山產
青金石頗產麥豆牛羊猪雞蜂蜜恩達察哇作貢桑
阿却宗俱產稻米麥豆蜂蜜葡萄胡桃牛羊騾子雞
猪等物昌都產稻米粟穀生薑黃連麝香熊胆自拉
里至昌都土民皆種稻康巴拉撒之南春結一帶土

民皆稱百巴世居黑帳房者名洛巴產騾子大頭狗
栽絨竹木蕨菜茜草葡萄胡桃青杠木拉撒之西干
巴白爾極土民名衛巴羊卓白地至札什隆布三桑
一帶土民皆名藏巴物產皆與藏同阿里噶爾渡一
帶產稻米粟米棗杏拉庫兒碗札木扎呀碗其價有
值數千金者召北浪子一帶土產同藏氣候稍寒納
克產依克駝洛海一帶前海子鹽水毒水拉撒至楊
八景一帶有霍甘一種人居黑帳房以牧畜打牲爲

業天寒不生五穀產馬牛羊狐狸沙狐捨狸獾白豹
金錢豹虎麝香野牛野馬野驢兕雉鶴黃鸞黑鸞雪
鷄野鷄野葱蒜韭當歸甘遂桑駝洛海吉扎布生根
物角一帶俱名昂獨無人烟地多溫泉海子產白鹽
民咸資以食拉撒東北由哈拉烏素至達木一帶皆
蒙古與霍耳人錯居不產五穀惟藉牛羊

歲節

西藏年節如臘月大以元日爲年小以初二爲年凡

商民停市者三日。各以茶酒菓肉等食物互相餽送。爲禮。郡王于元日設宴。布達拉請漢番官員及頭人。過年初九日。大召內聚集各山寺喇嘛四萬衆。迎接達賴喇嘛。諸佛登臺。或有名呼圖克圖。諷誦大經。至上元。郡王及噶隆牒巴等。各于大召周圍。大放花燈。紮木架。以五色油麵做人物龍蛇鳥獸。下設木架數層。安設大燈。周圍約數萬盞。自黃昏點起。至次早始徹。以天之晴陰風雪。並燈焰之色。占一年吉凶。如是。

夜天清氣爽月明無風燈焰光輝色正則一年人畜
安康五穀豐稔若天不明朗或遇風雪及燈焰紅白
烟爍乃爲不吉二十一日調集各處蒙古西番馬步
兵三千名頂盔貫甲執長矛弓箭鳥鎗藤牌馬亦從
頭至尾披掛五色甲囊各各跳舞放鎗遶召三次至
硫磺橋南點放火炮以爲迎神逐鬼其炮係銅鑄有
二十餘位內最大者一位上列威剿除叛逆五字鑄
自唐時事竣于布達拉庫內動發銀茶紬緞綾綿布

正金珠等物佈施僧衆以爲念經之資二十三日郡王及噶隆牒巴並有名大喇嘛各出八九名以至十四五歲幼童數名快馬數匹跑馬自色拉寺東山脚起由布達拉後至工布堂約三十里一氣跑到先到者賞緞紬哈達銀錢等物其次到後到者各分賞有差又選善走之人數十名自布達拉西跑至拉撒東止約十餘里亦一氣跑到別其先後分賞賞畢遶石跑三匝而散此以爲一年搶標奪彩之戲至二十七

日迎色拉寺之飛來杵至拉撒轉召二月三十日布達拉懸掛大佛其佛像係五色緞堆成自布達拉第五層樓垂至山脚長約三十丈將大召中所有寶玩金珠器皿陳列喇嘛裝束神鬼諸妖各番國人物牛虎象等獸轉召三次至布達拉大佛前各跳舞歌唱如此一半月間始散乃其地之春戲神鬼人獸等衣着頗極精巧華麗其寶玩無窮不能枚舉六月三十日別蚌寺色拉寺掛大佛亦裝神鬼等類垂仲下神

番民男女並皆華服艷裝或歌或唱翻桿子跌打各種跳舞亦二寺之大會也七月十五日另僱牒巴一人以司農事其他之頭目牒巴陪之遊街佩弓挾矢旗幡導引遍歷郊圻以觀田禾射飲一日以慶豐年然後土民刈獲七月十三日其俗各將涼棚帳房下于河沿遍延親友不分男女同浴于河至八月初五日始罷云七月浴之則去病疾至十月二十五日夜云係宗卡巴成聖之日各家以及寺廟山院皆于窻

櫺牆壁間，簇放燈數百，不等光明如晝，佈若列星，亦一大觀。又云：係古燃燈佛誕，未知孰是。亦以燈焰天色占次歲之吉。南十月十五日，唐公主誕辰，番民男女盛服而朝，家戶飲酒。十二月二十九日，木鹿寺跳神逐鬼，喇嘛裝束各種神佛，鬼怪至晚則遶召放鎗，吶喊以爲驅邪逐鬼。云爾。是日各寺院俱有會，男女皆華服盛飾，羣聚歌飲，帶醉而歸，以度歲節。

紀年

西藏不識天干惟以地支屬相紀年亦以十二箇月爲一歲以寅爲正月仍有閏月但其閏月不同時耳如雍正十年壬子閏五月其地閏正月雍正十三年乙卯閏四月其地于甲寅年閏七月更有閏日之異而無小建如閏初一則無初二卽至初三矣或於月內摘去二日卽不呼此二三日假如二十六日次日卽呼二十八日每月必有初一十五三十其呼正月曰端郭餘月仍挨數呼之紀日惟以金木水火土五

行配與憲書無異推日月之蝕亦纖毫不爽云推算占驗皆唐公主流傳者

風俗

西藏風俗鄙陋人皆好佛貪財不以淫亂爲恥不知臭穢輕男重女不設兒卓床鋪老幼男女皆隨地坐臥飲食惟茶爲最要次青稞炒麵酥油牛羊乳牛羊肉等類但牛羊肉亦多生食而食米麵者頗少衣服多係毛織男子有髮垢面不梳不沐婦女老少日以

糖脂或兒茶塗面貪淫嗜酒不啻狐行婚姻禮節迥不成風四方俗習并附

綠馬嶺一帶人頗勇健少賊盜民俱貿易人死碎割喂鷹如染瘟疫凶疾死者砍碎其屍或山或水分而棄之女未嫁髮順披嫁則將髮交叉搭頂上以紅哈達作圈勒頭上其他一切與藏同寧多 濯拉 阿

雜 拉里 大窩 說板多 洛隆宗 浪岩坡

恩達 察哇作貢 桑阿却宗 昌都等與藏同

惟昌都女未嫁髮順披嫁則珊瑚作兩花如菊大戴額上出嫁再不歸寧卽回亦止于門外飲以茶酒母至女家亦然大凡女子婦人一概忌入人家以爲不祥也廟宇內更嚴忌之若喇嘛與人通姦則將兩造剝皮植草其屍或投水或棄野以示儆獨此異于藏春結一帶婦人以珊瑚作一圓花下墜白螺殼于眉間男人以黑絨作帽披栽絨褊單面色多紫黑色遠望不類人形死喂鷹餘與藏同

干巴爾極一帶婦女嫁有夫以綠松石金銀鑲圓花如鏡大如湯碗口帶于額上名曰玉老後戴一冠名策勒插一簪名押籠餘同藏

羊卓白地 札什倫布 三桑女嫁則髮細細繩交頂上以珠石等類穿盤掛頭上項帶密蠟素珠一串有大如茶盞者人死喂鷹或沉水孝服百日不梳頭餘同藏

阿里 噶爾渡一帶男子帽高尺餘或錦或緞爲之

頂綴緯製彷彿冬帽婦女以珠作簷垂頭前後遮面項間穿圓領大袖衣著褐裙凡相見以哈達交換爲禮見長上不除帽唯以右手指自額上者三念噯嘛吽者三餘同藏

哈拉烏素 達木一帶居住皆蒙古同霍耳番子相參人死則遷居而遺屍于原住處男子衣帽同蒙古番婦戴白羊皮帽或狐皮帽髮細辮以琿渠石並銅環戴辮間垂至脚跟行則鏗鏘有聲穿褚巴束璊渠

飾帶著皮卷食奶茶炒麵茶馬奶酒又另是一種也

衣冠

西藏衣服冠裳多用毛氍毹魯富者亦穿紬緞布疋郡王頗羅鼐冬戴元狐帽或紅狐帽或錦或緞爲胎夏戴綿帽制仿秋帽式高六七寸平頂絲纓捲邊約寬二寸兩旁有袂以蟒緞或片錦爲之面上鑲獺皮窄邊居長穿大領無袂小袖衣名曰褚巴皆以五色緞錦或片子爲之亦用各色皮爲裡遇賀大節則穿

鱗衣貂皮披肩不穿大褂腰束金絲緞一幅作帶長六七尺腰匝二道亦帶小刀荷包之類必帶碗包一箇足穿香牛皮靴名曰項頭畜髮左耳帶珠墜所乘馬亦掛兩踢胸其屬下之噶隆牒巴人等只帶一箇踢胸所著裳服皆與頗羅衛同惟髮不束不綰不梳披垂肩後戴栽絨平頂大帽無纓亦或戴緞狐各樣帽其栽絨毛長二三寸如羊毛狀手帶骨扳指擎素珠束皮鞋帶或緞或絨或毛錫帶不等帶順刀荷包

碗包識字者腰插鐵筒狀如小刀鞘內裝竹簽描金
皮盒內貯墨水小銅瓶一筒寫字時盤膝坐地以紙
捲摺成行左手持定置于膝上右手握竹簽蘸墨水
自左而右橫書盡匠則以懶毛爲筆過節令或公事
噶隆將髮分作兩股于頂上左右各綰一髻身穿蟒
衣上披片子褚巴牒巴將髮亦綰成一髻戴無翅白
紗帽乃唐之遺制也左耳墜金鑲綠松石墜約酒鍾
口大其形似鳥獸以兩爪並嘴相擒掬一物狀名曰

瑣瑣右耳垂珊瑚墜用李大珊瑚兩顆上下金鑲名
曰工紬身穿六領窄袖紬綠錦短衣以水獺皮走邊
袖口用五色緞各一條相接前鑲獺皮下穿黑錫百
摺裙名曰郭在足著皮巷上披紅錫褊單插順刀帶
腰刀繫大紅花緞帶一條其巡街之役名曰郭家哇
逢時令會期亦穿蟒錦短衣黑錫裙帶腰刀繫緞帶
不披褊單不綰髮戴白圈帽如箭鼓子邊樣手持木
棍巡查打街自噶隆下至小民手上俱帶骨扳指大

領無袂褚巴或布氎氎紬緞等看其貧富爲之不拘
顏色皆穿而所戴之帽亦同腰束皮帶或毛褐帶小
帶小刀順刀碗包火鑲等物手擎素珠懷揣木碗具
鐔子襠內開袂腰兩旁亦開袂腰如荷包口紮束腰
間婦女服裝粧飾頭髮從頂分兩旁搓如繩交腦後
梢以繩束之女子未嫁腦後另分一辮以寶石珍珠
珊瑚之類戴辮上若受聘則將夫家所定之金鑲綠
松石一大塊戴頂上嫁爲婦則不復辮髮矣居常以

紅綠裁絨作尖頂小帽戴頭上脚穿布靴或皮巷下
穿十字花黑紅褐裙名曰東坡前穿圍裙或紅褐或
各色紬緞爲之鑲花邊名曰班帶上穿小袖短衣長
齊腰間名曰文肘綾緞細布毛褐皆爲之上披裁絨
小方單名繖手帶銀鑲珊瑚戒指名曰慈姑左手帶
銀釧名曰則籠右手帶磚碌圈寬約二寸名同籠乃
小時帶者至磨斷方已無論貧富必帶之云死後不
迷路耳帶金銀鑲綠松石墜長寸餘寬七八分後而

有小鈎掛于耳上名曰額哥上連珍珠珊瑚串綴以銀鈎掛髮上名曰吞達下以連珍珠珊瑚串長六七寸垂兩肩名曰重雜貴賤不等皆項掛素珠一二串自珊瑚青金碑礮磁器至木株者富室帶蜜蠟珠有大如茶盞者又帶一銀盒名曰阿務內裝護身佛子母藥之類胸前必掛銀鑲珠石環長有三四寸寬寸餘兩頭有鈎乃掛衣扣者名曰的拉不拘貴賤皆有之稍富餘則戴珍珠帽以木作胎如緯笠式而厚硃

紅漆裡以金鑲綠松石爲頂周圍滿戴珍珠于胎上
價有百千金者老年婦人以金鑲綠松石一片如鏡
約湯碗口大立戴于額上名曰白玉凡戴白玉親友
作賀宴客其蒙古婦女髮亦自頂分兩股打辮子以
青緞或青布作套束之約寬寸餘長二尺許以鈎掛
髮辮際垂兩乳旁足穿香牛皮靴身穿長衣上蓋鑲
邊齊肩長掛其掛腰作細褶仿朝衣褶耳帶纍絲金
鑲綠松石墜或珊瑚墜臉不敷糖脂不披方單冬夏

俱戴狐皮帽。

○飲食

藏番蒙古不拘貴賤飲食皆以茶爲主。其茶熬極紅入酥油鹽攪之飲茶食糝粳或肉米粥名曰土巴湯。其次面菓牛羊肉奶子奶渣等類牛羊肉多生食而日食不拘頓數以飢爲度食少而頻男女老少皆日飲醬酒乃青稞所釀淡而微酸名曰噲亦有青稞燒酒飲酒後男女相攜沿街笑唱爲樂。

○ 婚嫁

婚姻亦擇女婿、首取門戶相當、男識字者、佳女以善生理、識貨價、理家務爲善、亦通媒妁、惟富庶牒巴之家、方有之、其餘多苟合、如兩姓各知子女好否、男家以一哈達、託親友一二人、云我有男、願與某家女、聯姻、其某持哈達至女家、云某家有男、欲求汝女爲婦、將哈達遞上、彼此相樂、如不推謝、則云我于某日來說、于是日、女家遍招親友、以候其媒、乃攜男家酒、並

哈達至云其子弟行止年歲女家父母親友喜尤則飲其酒各受哈達另日媒人則將下聘之金鑲綠松石戴于女子頭上名曰色賈仍以茶葉衣服金銀羊腔牛腿各若干爲聘女家亦以禮回之如不允則男家之酒一滴不飲哈達亦不受至迎娶之時男女家必先延客數日亦以衣裙等物贈裝父母亦陪嫁田土牛羊衣飾至其日不用車馬女家于門外搭一涼棚內以方坐褥三五個高鋪于中將麥子撒爲花扶

女坐于上、父母旁坐、親友列兩行而坐、用小几桌擺
果食糖棗、各食物數盤、以茶酒米粥、與女食畢、二家
親友、則扶女步行、遠則乘馬、送親之親友、各將青稞
麥、撒其女、而女家則將蒙字哈達、共結一處、贈散親
友、送至男家、各不行禮、扶女與女偕坐、飲以茶酒、片
刻、則扶開分坐、親友各將哈達、與男女長者掛于項、
平交放于懷內、或堆積坐前、親友則列兩行而坐、飲
茶酒飯食畢、各攜菓肉而回、至次日、男女父母及親

友男女俱華服項掛哈達擁新婿新婦遠街而遊凡在親友門不延入權以茶酒送至街中飲之飲酒則團圓扶手男女跌坐而歌如是三日乃止

夫婦

西藏風俗女強男弱夫婦明媒正娶者少多皆苟合其差徭輒派之婦人故一家弟兄三四人只娶一妻共之如生子女兄弟擇而分之其婦人能和三四弟兄同居者人皆稱美以其能治家凡做買賣亦屬婦

人如種田禾紡毛線織辮子當烏拉人皆笑其無能然不以淫亂爲耻父母不之禁夫婦不之怪如有外交則明告其夫曰某爲我之英獨其夫怡然夫婦悅則相守不願同處卽自擇所欲而適焉

○生育

西藏生育子女不洗浴不剃頭落地時其母以舌舐之至三日卽以清油酥油塗擦週身晒于日中數日卽以炒麵調湯灌之多不與乳食稍長男子教書算

或習一技、女子則教識戠秤、作買賣、紡毛線、織氍毹、不習針工、不拘女、誠而生育、以女爲喜、風俗信重喇嘛、如一家之中、子女多者、必有一二爲僧、女爲尼者、

○喪葬

西藏凡人死、不論老少男女、用繩繫成一塊、膝嘴相連、兩手交插腿中、以平日所著舊衣裹之、盛以毛袋、男女羅哭、用繩吊屍于梁、延喇嘛念經、以酥油送天、小召點燈、或數十觔、或百觔、諒其貧富、將死者所有

之物盡出以一半、佈施布達拉、以一半、變賣、作延請喇嘛念經、並熬茶、及一應施捨之需、卽父子夫婦亦不肯存留一物、其屍放二三日、或五七日、背送剛人場、縛于柱上、碎割喂犬、骨于石臼內杵碎、和炒麵搓團、喂狗、剛人之人、亦有腰帶束、每割一屍、必得銀錢數十枚、無錢、則棄屍于水、以爲不幸、其喇嘛、則喂鷹、皆以火化、築塔、親友弔問、窮者、助以銀錢一二枚、富者、以哈達慰問、並送茶酒、其孝服、男女百日、不穿

華服不梳不沐婦人不帶耳墜素珠而已他無忌富者時常請喇嘛念經以荐亡魂至一年乃止

○醫藥

西藏醫名厄木氣葯不炮製皆係丸散亦診視而後用葯其視脉以左手執病者之右手右手執病者之左手一時齊脉不分先後但番人無論老幼男女小疾則以清油酥油遍體擦之暴于日中若陰天以絨單覆蓋用柏葉燒烟薰之重者始診脉服藥或刺血

然不論病之輕重必延喇嘛念經或珠巴念誦祈禳珠巴卽道士之類或令童男女唱佛歌以祛之

○占卜

西藏占卜之術不一有等喇嘛以紙畫八卦書番字而占者有以青稞排卦抽五色毛線而占者或數素珠而占者或畫地而占者或燒羊骨或看水碗種種不一然亦有頗驗者大抵在所學之精淺耳婦女亦有會者不能悉述

○禮儀

自噶隆牒巴下至小番見郡王並公等俱止卸帽子
手伸舌打半躬垂手曲腰各自就坐凡進見必遞哈
達一箇如中華投遞手本之意若係平交則彼此交
換爲禮卽書信中亦必置一哈達蓋如我之投刺之
意若路遇則側立抹帽垂手打躬其平民見噶隆牒
巴頭人之禮亦如之自郡王下至番民見達賴喇嘛
皆卸帽合手三禮拜曲腰垂手至法坐前達賴喇嘛

以手抹頭一下。謂之討捨手。

○宴會

歲時令節。郡王亦知宴客。或在家。或于各柳林中。正中鋪方褥數層。郡王自坐。前設矮方桌一二張。上擺麪果。長尺許。生熟牛羊肉。藏棗。藏杏。藏核桃。葡萄。冰糖。回回果。焦糖等類。各一二盤。其焦糖乃黑糖同酥油熬成者。長尺餘。寬三四寸。厚一指。牛羊兩翼一腿。或一大方。隨時兩回鋪長坐褥。前亦換設矮桌。擺列

果食等類各半。郡王之半噶隆、牒巴、浪子、沙仲、意等列兩行而坐。或兩人一席，或一人一席。隨從人等各就席後地坐。每人給果食一大盤。食則齊食。先飲油茶。次以土巴湯。再以奶茶。抓飯乃纏頭回民所作。有黃白色二種。用米作飯。水淘過。入沙糖、藏杏、藏棗、葡萄、牛羊肉、餅等物。盤盛。手抓而食。繼飲蠻酒。遇大節會筵。乃選出色婦女十餘人。戴珠帽。穿彩服。行酒歌唱。近有能唱漢曲者。又有八九十二三歲小童十數。

名穿五色錦衣帶白布圈帽腰勒錦條足擊小鈴手執鉞斧前後相接又設鼓十數而其司鼓者裝束亦同每進食一巡相舞之于前步趨進退與鼓聲相合揆其義倣古之佾舞歟食畢肉果等物俱各攜去不留亦或設宴請漢官凡此食物等品自郡王下至小民皆同惟行酒婦女童舞鼓吹除郡王而外他皆無也總之主人上坐客至不起立不迎送若在主入之上者始讓之其酒罐上必以酥油捏口上以爲敬

碗皆自懷。食已不洗。以舌舐之。民間宴筵。男女同居坐。亦同坐。彼此相敬。歌唱酢答。竟日始散。時男女團聚。攜手跌坐而歌之。至門外街中。歌唱而散。富者每月二三。

○市肆

西藏習俗。貿易經營。男女皆爲。一切縫紉。專屬男子。通用皆銀錢。每箇重一錢五分。上鑄番字花紋。其名曰白_レ丈_レ。以銀易錢而用。若易貿碎小之物。以蒙子哈

達茶葉酥油、易換至市中貨物、商賈有纏頭回民販賣珠寶、其布疋紬緞綾錦等項、皆販自內地、有白布回民、販賣氍毹藏錦、卡契緞布等類、皆販自布魯克巴勒布天竺等處、有至物子、專賣牛黃阿魏等物、其他藏繭、藏紬、氍子、氍毹、藏布、以及食物諸項、藏番男女皆賣、俱不設鋪面桌櫃、均以就地擺設而貨、

○房舍

白爐至前後藏、各處房皆平頂、砌石爲之上、覆以土

石名曰礪房、有三層、至六七層者、凡稍大房屋、中堂必雕刻彩畫裝飾、堂外壁上必繪一壽星圖像、凡鄉居之民、多傍山坡而住、惟甲貢地方有草房、其蒙古住格爾牛羊廠、住黑帳房、而拉撒境內大房頗多、有可住數百人者、如大召南之拉撒興廈內、安設銅鍋一口、可盛水百十餘担、以供念大經熬茶之用、卽此可類推矣、

○刑法

西藏相沿番例三本計四十一條所載刑法甚酷大
石旁有黑房數間拘繫罪人犯法者不論罪之輕重
皆禁于內用毛繩將四肢綁起聽候發落如二姓鬪
毆致命者將屍棄水凶手只罰銀錢充公竝給屍親
念經或銀若干牛羊若干追比全完而釋之無銀則
縛棄水中籍沒其家其搶奪劫殺者不分首從皆問
死罪或縛于柱上以鎗打箭射較射飲酒死則割頭
懸示或送狍獐野人食之或活縛送曲水蝎子洞令

蝎子食之。若偷竊不道，將全家鎖拿，監內追比。或一陪三陪六陪九追完，將正賊去目鼻砍手。凡犯重罪，先以繩繫縛，以皮撻數十，拍于水中，泡一時，取起再撻之。如是者數次，然後審訊口供。如其不認，則以滾油滴其胸，用大刀裂其肉，再不招，則細縛坐水中，髮分兩股，以繩左右牽之，用白粗布蒙面，以水立澆之。不認，再澆。或于十指甲內下油簽，若永不招供，而後釋放，倘熬刑而死，棄屍水中，其刑法慘酷，從未之聞。

至爭鬪打架告理者罰銀。曲多直少犯而不告者。各重罰。無銀則以長棍責釋。若犯姦情。止罰銀錢。隨其貧富。多寡不等。亦或責釋。但犯法無論男女。俱于市中。去衣責之。近亦有枷號者。其刑法可知人之頑俗之惡矣。